

□ البيه المأمور □

بدا على وجهى أننى لا أعرفه ، فاستطرد قائلاً :
— حضرتك ما تعرفنيش ، بس أنا أعرف سيادتك ، أنا ابن
المرحوم حمد الله زميلك فى القناطر . هتفت بدون وعى :
— يا سلام .. أهلا يا بنى .
وهجمت على الشاب الذى يقف أمامى واحتضنته وقلت :
— الله يرحم أبوك .. بس أنت عرفتنى إزاي ؟ دا أنت كنت
صغير لما مات .

قال وهو يبتسم :
— كان عمري ١٠ سنوات .. بس لما كبرت قرئت الجوابات اللي
كان بيعتها لنا من هناك ، ما كانش له سيرة فى الجوابات إلا
حضرتك
سألته متلهفا .
وأخواتك فين ؟

— البنات اتجوزوا ، وياسر بيشتغل محامى ، وإسماعيل
محاسب ، وأنا هاجرت هنا وأنا عندي عشرين سنة واشتغلت
ودخلت الجامعة ، وخذت البكالوريوس ، واشتغلت فى الحكومة
الدنماركية ، وبعدين سبتها واشتغلت فى الأعمال الحرة ، وشاركت
واحد مصرى مقيم هنا ، وربنا أكرمنا وبنشتغل هنا وفى مصر
وعندنا قرية سياحية فى شرم الشيخ ، وأرض زراعية فى
الإسماعيلية.

— ووالدتك راحت فين ؟
— توفاه الله ودفناها جنب أبويا .
وصافحت إبراهيم حمد الله مودعا ، وركبت السيارة مع
السفير وقرأت الفاتحة على روح البيه مأمور الضرائب حمد الله
أفندى ، صديق ورفيق سجن القناطر .